

Comisario interino Rasmijn

Recompensa di desobediencia contra ley y orden ta causa falta di respet pa autoridad

ORANJESTAD(AAN) -- Comisario interino Rasmijn durante un conferencia di prensa a duna di conoce e ruta nobo pa e parada di carnaval.

Despues di a anuncia e ruta el a reacciona ariba e critica cu a surgi den algun gremio y cerca algun persona en coneccion cu e decision pa cambia e ruta di carnaval.

Comisario interino Rasmijn a bisa: "Ta worde treci dilanti como si fuera e decision lo ta basa ariba capricho y cu e intencion pa castiga pueblo celebrador di carnaval.

Wel, al contrario pasobra e intencion tras di e cambio di ruta ta net pa defende e derecho di e ciudadano cu si ta respeta ley y reglanan estableci.

E intencion tras di e cambio di ruta aki ta pa duna tur ciudadano, rico y pover e oportunidad igual pa por celebra carnaval.

Tanto promer como despues cu a cuminsa desobedece e reglamento Dialunaochi ultimo, avalancha di yamada a dreña na Polis.

Promer tabata ciudadanonan responsable puntrando si ora por cuminsa escoge nan lugarnan banda di ruta. E contesta tabata pa tene un tiki pasenshi pasobra esaki lo worde anuncia di tal forma cu tur ciudadano haya igual oportunidad pa decidera a lo largo.

Diasabra mainta un matutino a kibra e codigo di confianza y a publica, siendo duna bao di embargo, e permiso general. Esaki tabata encera cu entrante 14 di Februari pa 8'or di mainta por a staciona trailer y vehiculonan pa por mira e carnaval grandi pasa dia 25 di Februari proximo.

Grandi tabata mi sorpresa ora

cu Dialunaochi despues di un reunion mi a pasa un vuelta ariba e ruta pa pone mi mes na altura di e situacion y a haya Vondellaan y Smith Boulevard yena cu vehiculonan caba.

En bista cu e vehiculonan aki claramente tabata staciona pa despues worde dorna, of hasta cambia pa trailernan, tur e personanan aki e mesun anochi a worde bisa pa kita nan vehiculonan for di e ruta sino e ruta lo worde cambia.

Como cu ningun di e infractornan no kier a reacciona a laga pasa na radio e mesun anochi ainda cu si no kita e vehiculonan promer cu dia 14 di Februari pa 10'or di mainta, e ruta di carnaval lo worde cambia.

Como cu e ora stipula a pasa y no a bin cambio, a worde dicidi cu e ruta lo cambia.

A worde presenta na SAC algun ruta alternativa y finalmente den convenio cu SAC a yega na e ruta nobo.

E yamadanan despues di Dialunaochi no a bira menos y esaki a yuda mas ainda na tumamento di e decision aki cu kizas lo no ta mucho popular, principalmente cerca esnan cu a cause. E yamadanan tabata encera malcontento di esnan cu si kier mantene nan mes na ley.

E ruta nobo ta duna tur hende tanto esnan cu a respeta regla y esnan anti-reglamento, e mesun oportunidad awor. Claramente por mira door di e acontecimiento aki un tendencia di no obedece ley.

Compensando e tendencia aki bo ta trece cune cu mas y mas obediente na ley y orden lo bay na e banda di desobediencia y a lo largo nos ta bay den direccion di anarchia. Nan tambe lo bay bisa cu ley ta perjudicabo, pesey lo mester viole.

Esaki ta bay afectando e fundamento di derecho den nos comunidad. Mi sa cu e caso aki lo no bay ta na agrado di basta hende, pero al fin al cabo e funcion cu ami a acepta no ta uno di gana popularidad sino pa na dado momento tuma decisionnan sin haci distincion entre ningun hende y ningun instancia.

Como comisario di Polis mi tarea principal ta pa mantene orden publico y enforza leynan vigente. Si mi tin cu escoge entre injusticia acompaña cu popularidad di un banda y di otro banda justicia acompaña cu impopularidad, mi lo escoge pa e ultimo". Esaki pues tabata e declaracion di Comisario interino Rasmijn.